

修訂日期: 2004/10/09 發行日期: 2006/2/1

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 4, No. 218

原始資料: 蕭鎮國大德提供, 維習安大德提供之高麗藏 CD 經文, 北美某大德提供

No. 218

佛說灌頂王喻經

西天譯經三藏朝奉大夫試光祿卿傳法大師賜紫臣施護等奉 詔譯

爾時世尊。在舍衛國。以因緣故。告諸苾芻言。汝等當知。有三剎帝利王。於三時中。在於某方。受王灌頂。而彼三王。乃至盡壽。常所思念。何等為三。謂第一王。年方少盛。依灌頂法。在於某方。受王灌頂。得灌頂已。乃至盡壽。常所思念。又第二王。功力漸大。依灌頂法。在於某方。受王灌頂。得灌頂已。乃至盡壽。常所思念。又第三王。有大威力。戰勇最勝。一切對敵。而悉信伏。以最勝故。得勝安住。依灌頂法。在於某方。受王灌頂。得灌頂已。乃至盡壽。常所思念。汝諸苾芻。亦復如是。於三時中。在於某方。作修證事。乃至盡壽。常所思念。何等為三。謂有苾芻。發正信心。捨家出家。剷除鬚髮。被袈裟衣。此為第一。在於某方修苾芻事。乃至盡壽。常所思念。又有苾芻。修諸勝行。為證滅故。斷諸集法。如是知己。遠塵離垢。於諸法中。得法眼淨。此為第二。在於某方。修苾芻事。乃至盡壽。常所思念。又有苾芻。諸漏已盡。非漏隨增。心善解脫。慧善解脫。自智所證。已得成就。我生已盡。梵行已立。所作已辦。不受後有。此為第三。在於某方。證聖果事。乃至盡壽。常所思念。

佛說灌頂王喻經